

**Folkehjuskolit pillugit Inatsisartut peqqussutissaattut nr. xx, uu. qqqq 2002-meersussatut siunnersuummut nassuiaatit.**

**Nalinginnaasumik nassuiaatit.**

*Siunnersuummut tunngavik*

Kalaallit Nunaanni folkehjuskolit allaffissornikkut aqunneqarput Hujuskolit pillugit Inatsisartut peqqussutaat nr. 1, 16. oktober 1980-imeersoq Kalaallit Nunaanni folkehjuskolit pillugit inatsit nr. 609, 23. december 1980-imeersoq tunngavigalugu aalajangersarneqartoq malillugu. Peqqussutissatut siunnersuutip matuma aalajangiunneqarneratigut peqqussut 1980-imeersoq atorunnaarsinneqassaaq.

Peqqussutissatut siunnersuummi peqqussutip siunertaa ullumikkut atuuttoq tunngavigineqarpoq taamaattumillu folkehjuskoli pillugu isuma attatiinneqarluni. Taamaalilluni allannguutissatut siunnersuut ullumikkut pissutsinut naleqquttunngorsaaneruvoq. Allannguutissatut siunnersuut aalajangersakkanut ataasiakkaanut nassuiaatini itisilerneqarmat nassuiarneqarlunilu, peqqussutissatut siunnersuummi uani nalinginnaasumik nassuiaatit tunngaviusut taamaallaat naatsumik oqaaseqarfigineqassapput.

Folkehjuskolit pillugit Inatsisartut peqqussutaat massakkut atuuttoq 1980-iminngaaneersuuvog taamanimiillu peqqussutip aalajangiunneqarneraniit maannamut annertuunik pisoqarsimavoq. Ilinniartitaanermut tunngasut allangorsimapput aammalu ilinniartitaanerup iluani tamarmi peqqussutit nalunaarutillu arlalipassuit aalajangersarneqarsimallutik, aalajangersakkatigullu nutaatigut ilinniagaqarnersiutinut tapiisarnermi periaatsit allangortinneqartarsimallutik. Taamaattumik folkehjuskolit pillugit Inatsisartut peqqussutaat 1980-imeersoq pisoqalisimasutut oqaatigineqarsinnaavoq tassani aamma eqqarsaatigalugit folkehjuskolit pillugit taaguutit atorneqartut, ilinniagalinnut tapiissutit aningaasaliisarnermilu maleruagassat. Taamaattumik pissusissamisoorpoq aalajangersakkat ataasiakkaat iluarsaatissallugit naleqqussassallugillu.

Kalaallit Nunaanni folkehjuskolit marluusut; Knud Rasmussenip Hujuskoliata aammalu Sulisartut Hujuskoliata 90-ikkut aallartereerneranniilli peqqussutip pissutsinut naleqqussarneqarnissaa kissaatigisarsimavaat. 90-ikkut ingerlaneranni peqqussut pillugu arlaleriarluni ataatsimiittoqartarsimavoq. Taamaattorli peqqussut iluarsaallugu sulineq aatsaat 1998-imi pimoorullugu aallartinneqarluni.

Peqqussutip iluarsaannissaanut peqatigitillugu hujskolini taakkunani marluusuni timersuutini

ingerlatsisarnissat, nipilersornermik ilinniarfik kiisalu assassorluni kusanartuliornermik ilinniartitsinissaq oqaluuserineqartarput. Tamatuma saniatigut inuusuttut ilinniagaqarusuttut ilinnialivinnissaminni piukkunnarnerulersinnissaannut hujskolit atorneqarsinnaanerata aamma eqqartorneqartarsivoq, soorlu hujskolernikkut ilinniartut atuagarsornikkut piginnaasaat pitsangorsarlugit. Tamakku tamarmik peqqussutissatut siunnersuummi pingaartillugit periarfissatut ilaatinneqarput.

Folkehujskoleqarnermi pingaarnerpaaq tassaavoq inersimasut tamanut tunngasunik ilisimasaqalernissaannik ilinniartitsinissaq. Pisorta qarfiup ukiuni kingullerni hujskolinit erseqqissartariaqartarsimavaa, pikkorissartitsinissat tapiiffigineqarsinnaasutut akuerineqaqqullugit kissaatigineqartut siunertatut aalajangiussaq naammassisassagaat, imaappoq tamanut tunngasunik ilisimasaqalersitsissasut. Tunngaviuvoq Pisorta qarfik assersuutissaqarmat pikkorissartitsinissatut nalunaarutigineqartut arlallit matoqqasuusartut, assersuutigalugu sulisartut peqatigiiffini pikkorissartitsinerit. Pisorta qarfik tamatuma kingunerisaanik hujskolit marluusut pisortaannik taakkulu siulersuisuisa aallartitaannik ataatsimeeqateqartarsimavoq taamaalillunilu siunertatut aalajangersakkap isumaqataaffigineqarnera anguneqartarluni.

### *Siunnersuutip imai*

Peqqussutissatut siunnersuummi allannguutissat pingaarnertit tassaapput hujskolit aningaasaqarnerat pillugu aalajangersakkat. Aalajangersakkat taakku pillugit hujskolit pisorta qarfillu ukiuni arlalinngortuni ajornartorsiuteqartarsimapput. 1980-imiilli Inatsisartut ataatsimiittarnerini hujskolit aningaasaqarnerat eqqartorneqartalereersimavoq, ilaatigut oqaatigineqartarsimalluni hujskolit sulinerannut aningaasaqarnikkut aaqqissuussinissaq nassaarineqartariaqartoq, "hujskolit piuinnaassangitsut, kisiannili aamma nalinginnaasumik isumatuumillu ingerlanneqassasut, aningaasaqarneq piffissarujussuarmik nukinillu atuiffigiuaannarnagu".

Ilinniartunut hujskolimiittunut ilinniagaqarnermi tapiissutisiat pillugit maleruagassat siunnersuummi uani annertuumik allanngortinniarnaqarput. Ukiuni kingullerni nunatta avataani hujskolertunut ilinniagaqarnerisiuteqartitsisoqartarpoq, nerisarnerup ineqarnerullu ilanngaatigereerneratigut qaammammut 1.850 kr.-it. Maleruagassat taakku atuussimapput oqaatsinik ilinniarfinni hujskoliniittunut taamatullu timersornermut nipilersornermullu ilinniarfinni hujskoliniittunut. Kalaallit Nunaata avataani timersornermut nipilersornermullu iliniarfinni hujskolimiittunut aningaasaliissutit aningaasanut inatsimmi kontoni 40.13.50-imi aamma 40.13.60-imi inissinneqarput.

### *Oqaaseqaatit tiguneqartut*

Siunnersuut hujskolinut marluusunut KANUKOKA-mut kiisalu pisorta qarfinnut tamanut tusarniaassutigineqarpoq. Nassuiaatit tiguneqartut siunnersuummi matumani ilanngullugit suliarineqarput.

Hujskolit KANUKOKA-lu ataatsimeeqatigineqarsimapput taakkualu tamarmik siunnersuut taamatut isikkoqassasoq isumaqataaffigaat.

Peqqussutissap inatsisitigut misissoqqissaarneqarnerani oqaaseqaatigineqartut peqqussutissami ilanngunneqarput.

#### *Aningaasaatigut kingunerisassat*

Siuliani taaneqartut ilinniartunut tapiissuteqartarnermut maleruagassat annertuumik allan-ngortinneqarput, peqqussut taanna malillugu hujskoliniittut ilinniagaqarnersiuteqalersinnaalissammata.

Hujskolini taakkunani marluusuni aningaasartuutissat naatsorsorneranni ilinniartut katillugit ukiumut 40-sasut aalajangiunneqarpoq (qallunaatut 40 årselever). Hujskolit atuartitsinermik ingerlatsisinnaapput atuaqatigiiaat marluk sivikinnerusumik imaluunniit atuaqatigiit ataatsit katillugit sap. akunnerini 36-ni atuartinnerisigut. Tamanna naapertuutissaaq ilinniartut qaammatini 8-ni ilinniagaqarnersiuteqartinneqarsinnaanissaannut.

Ilinniartut hujskolimiinnissat sap.ak. 18-ini marloriarlugit hujskolit aaqqissuutissappatigik ukiumi ataatsimi ilinniartoq ataaseq angalanermini siumut utimullu marloriarluni aningaasaliiffigineqartussaavoq. Ilinniartumut ataatsimut siumut utimullu angalanissaq 5.000 kr.-inik aningaasartuutigineqartussat naatsorsuunneqarpoq.

Qaammatini 8-ni ilinniagaqarnersiutit 1.850 kr.-init ilinniartut ukiumut 40-nut	0,6 mio
Ilinniartut atuaqatigiiaat marluk 40-t angalanerat 5.000 kr.	0,4 mio
Aningaasartuutissat katillugit	1,0 mio

Ilinniartut angalanerannut aningaasartuutit maannamut aaqqissuussinermi atuuttumi hujskolinut aningaasaliissutinit akilerneqartartussaapput aningaasanut inatsimmi kontu 40.12.12-imi.

Siunnersuummi aningaasatigut ataatsimut kingunerisassat katillugit 1,0 mio. kr.-iussapput.

Siunissami hujskolinut tapiissutaasartussat kontumi 40.12.12-imi hujskolit marluk akornanni marlungorlugit assigiimmik avinneqartassapput, hujskoli ataaseq ukioq naallugu aningaasartuutissat naatsorsorneranni ilinniartunik 20-nik (20 årselever) atuartoqassappat aammalu sap. akunnerini 36-ni sammisaqartitsinissanik tapiissutinik pissarsinissamik pisinnaatitaaffiusunik ingerlatsiviussappat.

Hujskoli aningaasartuutissat naatsorsorneranni ilinniartut katillugit 20-nik (20 årselever) atuartoqanngippat tapiissutit ikilineqassapput ukiumut atuartuusimasut amerlassusiannut aammalu sap. akunnerinut atuartitsiviusimasunut naleqqiullugit.

Hujskolinut tapiissutissanik nutaamik naatsorsuisalernissaq kontumut 40.12.12-imut aningaasaqarnikkut kinguneqarnaviangilaq.

## **Aalajangersakkanut ataasiakkaanut nassuiaatit**

### *§ 1- imut*

#### *imm. 1-imut*

Imm. 1-imi aalajangersakkap piginnaatitsinermut inatsimmi § 1, imm. 1-imi aalajangersagaq assigaa - Kalaallit Nunaanni folkehjujskolit pillugit inatsit nr. 609, 23. december 1980-imeersoq aalajangersarlugulu folkehjujskolit ilinniartut inersimasut tamanik tunngasunik paasisaqarnissaannik ilinniartissallugit neqeroorfiggissagaat, imaalillugulu ilinniartitsissutini sammisat ataasiakkaat imaluunniit ilinniartitsissutini sammisat ataatsimoortukkaat siunertap pingaarnerup killiliussat iluanni salliusutut inissinneqarsinnaallutik. Folkehjujskolit assersuutigalugu hujskolimiinnissamik neqerooruteqarsinnaapput nipilersornikkut, timersornikkut imaluunniit eqqumiitsuliornikkut ilinniartitsissutit siunertamut pingaarnermut atatillugu sallinneqarsinnaallutik. Folkehjujskolit siunertaraat innuttaasut periarfississallugit kulturikkut, ilinniartitaanikkut ilisimatusarnikkullu susassaqarfii iluanni nalinginnaasumik ilinniartinneqarnissaannik aammalu ilinniartitsineq atorlugu innuttaasut nalinginnaasumik qaammarsaanermut ilaalissalluni. Tamanut tunngasunik paasisimasaqalernissamik ilinniartitsineq folkehjujskolit tassaassapput innuttaasut paasisimasaqarnerulernissaannut periarfissat ilaat. Tamanut tunngasunik paasisimasaqalersinnaaneq tassaavoq immikkut ittumik pisinnaasaqalersitsinermik ilinniartitsinermut illuatungiusoq.

#### *imm. 2-mut*

Naalackersuisut piginnaatinneqarput maleruagassanik aalajangersaanissamut folkehjujskolit immikkut ittumik pisoqartillugu piginnaatitsinermik tunniussiffiusumik ilinniartitsinissamik neqerooruteqarsinnaatillugit. Oqariaaseq piginnaatitsinermik tunniussiffiusoq tassaavoq piginnaatitsinermut inatsimmik allaqqiineq. Taamaattorli imm. 1-imi siunertaq pingaarneq tunngavigalugu Naalackersuisut piginnaatitsinerat tamanut tunngasunik paasisimasaqalernissamut pisinnaanermik tunniussiffiusumik ilinniartitsinissamut killeqartitsissaaq, imatut tunngaviatigut oqaatigineqarsinnaavoq meeqqat atuarfiata inaarutaasumik

misilitsitsineratut aammalu meeqqat atuarfiata annertusisamik inaarutaasumik misilitsitsineratut.

### *§ 2-mut*

Aalajangersakkap § 11 pioreersoq assigaa, kisianni allaanerulaartumik imaqartinneqarluni. Aalajangersakkap Naalakkersuisut piginnaatippai ilinniartunngornissamut aammalu ilinniarnermi tapisiat tunniunniissaannut periaasissaq pillugu maleruagassanik aalajangersaanissamut. Aalajangersakkap massakut atuuttup Naalakkersuisut piginnaatippai ilinniartunut tapiissuteqartitsisalernissamik aammalu taakkuninnga tunniussinissamik qinnuteqaatit pillugit maleruagassanik aalajangersaanissamut. Siunnersuutip Naalakkersuisut piginnaatippai folkehjuskolini ilinniartunngornissaq pillugu maleruagassanik aalajangersaanissamut, tassani siunertarineqarpoq Naalakkersuisut piginnaatinneqarnerat aqutigalugu qulakkeerneqassasoq ilinniartussat folkehjuskolini ilinnialersussat nunamit tamarmit aggersuunissaat.

Aammattaaq Naalakkersuisut piginnaatinneqarput ilinniarnermi tapiissutisianik tunniussinissamut maleruagassanik aalajangersaanissaminnut. Siunertarineqarpoq sivisunerusumik hujskolimiinneq Nunatta karsiait aningaasalerneqartussaq folkehjuskolinit ingerlanneqarnissaa, kisianni Ilinniagaqarnersiuteqartitsiviup aammalu folkehjuskolit ataasiakkaat akornanni isumaqatigiissuteqarnissaq pisariaqassaaq, taakku suliffeqarfiummata imminnut pigisut. Siunnersuummi piginnaatitsineq periarfissiivoq ingerlatsiviup folkehjuskolinit isumaqatigiissuteqarsinnaneranut maleruagassanik aalajangersaanissamut. Naalakkersuisut maleruagassanik aalajangersaalersinnagit folkehjuskoliniit nassuiaatinik pissarsisoqassaaq.

### *§ 3-mut*

Aalajangersarneqarpoq folkehjuskolit suliffeqarfittut imminnut pigisutut ingerlanneqassasut. Aalajangersagaq § 5-imut ataqatigiissinneqassaaq, tassani pineqarmat perorsaannermut, atuartitsinermut ilinniartitsinermullu pisortaq akisussaasoq, akisussaaffiit allat tamaasa siulersuisut akisussaaffigaat. Siulersuisut Naalakkersuisut tungaannut akisussaaffigissavaat suliniutit Nunatta karsiata aningaasataanik aningaasaliivigineqartut, aamma takukkit § 10-mut § 13-imullu nassuiaatit.

### *§ 4-imut*

#### *imm. 1-imut*

Aalajangersakkami pineqarput siulersuisut suliassaasa ilaat, ilaatigut erseqqissarneqarluni siulersuisut suliniutissanik aalajangersaassasut. Imaappoq folkehjuskoli piffissamut pineqartumut suliniutissanik pilersarusiussasoq,

assersuutigalugu ukiut ataasiakkaarlugit. Pilersaarutit taakku siulersuisunit akuersissutigineqassapput. Aamma folkehujskolip suliassaannut siulersuisut maleruagassiussapput, siunissamut qaninnerusumut ungasinnerusumullu. Siulersuisut folkehujskolip ineriartornissaanut maleruagassiussapput.

Siulersuisut Naalakkersuisunut akisussaapput suliniutissat siunertatut aalajangersakkamut naapertuunnissaannut, tassani ilanngullugu ilinniartitsinerup tamanut tunngasunik paasisimasaqalersitsinissaanut, takuuk § 1.

*imm. 2-mut*

Taanna aalajangersagaavoq nutaaq. Peqqussummi atuuttumi siulersuisut pisortaq atorfinitsissavaat Kultureqarnermut Atuartitaanermullu Naalakkersuisup akuersereerneratigut. Siunnersuummi siulersuisut pisortap atorfinitsinnissaanut akisussaatinneqarlutillu pisinnaatinneqarput.

*imm. 3-mut*

Aalajangersagaq nutaajuvoq erseqqissarlugulu siulersuisut malittarisassaliussasut. Aamma siulersuisut § 6, imm. 2 naapertorlugulu malittarisassat akuerisassatut inassutigissavaat. Aammattaaq erseqqissarneqarpoq siulersuisut sulinissaminnut najoqqutassiussasut. Tamatumunnga tunngaviuvoq siulersuisut sulineranni pitsaassusissap qulakkeernissaanik kissaateqarneq.

## § 5-imut

*imm. 1-imut*

Aalajangersakkami erseqqissarneqarpoq pisortaq perorsaanermt, atuartitsinermt ilinniartitsinermtullu akisussaasoq aammalu ulluinnarni aqutsineq aqutugalugu siulersuisut aalajangigaasa piviusunngortinnissaat isumagissallugu. Aammattaaq pisortaq pisussaaitaavoq maleruagassat malittarisassallu atuuttut naapertorlugit suliffeqarfik aqussallugu.

*imm. 2-mut*

Aalajangersagaq taanna nutaajuvoq oqaatigineqarlunilu folkehujskolimi sulisunut tamanut tunngatillugu pisortaq atorfinitsitsinissamut soraarsitsinissamullu pisinnaatitaasoq. Pisortaq siulersuisut aalajangigaasa piviusunngortinnissaannut siulersuisunut akisussaammat pissusissamisoornerpaassaaq pisortaq aamma tassaassasoq sulisut sorliit tassani ilanngullugu sulisut katitigaanissaannik toqqartuisussaq. Taamaalilluni pisortaq suliassat suliarinissaannut nukiiit annertunerpaanissaat qulakkeersinnaalissavai.

## § 6-imut

*imm. 1-imut*

Peqqussut manna malillugu tapiissuteqartoqarsinnaassappat folkehujskolit Naalackersuisunit akuerineqarnikuussapput aammalu tapiiffigineqarnissamut §§ 8-10-mi piumasaqaatit naammassisimassallugit. Taamaalilluni inatsit atuuttoq pillugu erseqqissaasoqarpoq oqaasertaasa aaqqissuussaanerannik allannngortitsisoqarluni. Oqaasertaasa allanngorneri tassaapput Kultureqarnermut Atuartitaanermullu Aqutsisut siusinnerusukkut folkehujskolit akuersissutigisarmagit. Erseqqissaassut tapiissuteqarnissamut piumasaqaatinut innersuussineruvoq, tassani erseqqissumik oqaatigineqarmat Nunatta karsianit tapiiffigineqarnissamut piumasaqaatit immikkoortut marluusut. Siullermik folkehujskoli akuerineqaaqqaassaaq kingornalu taassuma tapiiffigineqarnissamut piumasaqaatit naammassisimanerai misissorneqassalluni.

Folkehujskolit pioreersut marluusut, Sisimiuni Knud Rasmussenip Hujskolia aammalu Qaqortumi Sulisartut Hujskoliat peqqussut manna naapertorlugu tunngaviuvoq akuersissutigineqareersimassasut. Taamaattorli siulersuisut 1. marts tikitsinnagu malittarisassat akuerisassanngorlugit nassiutereersimasussaavaat, taamaaliornikkut nakkutigineqassalluni taakku peqqussummi matumani aalajangersakkanut naapertuuttut.

*imm. 2-mut*

Aalajangersakkami aalajangersarneqarput folkehujskolit akuersissutiginiisaannut Naalackersuisut tunngavissaat. Naalackersuisut folkehujskolit taamaallaat akuersissutigisinnaavaat paragraffimi piumasaqaatit marluk taaneqartut naammassisimappatigik.

Pisinnaasassat annertusinissaannik akuersinissamik peqqussummi § 2, imm. 2-mi atuuttoq atorunnaarsinneqarpoq, folkehujskolinut tapiissuteqartarnissaq pillugu maleruagassat nutaat pissutigalugit.

Peqqussummi atuuttumi pisortaq Kultureqarnermut Atuartitaanermullu Naalackersuisumit akuerineqartussaavoq. Tamanna imaalillugu allannngortinneqarpoq hujskolimi pisortaq siulersuisunit atorfinitsinneqarlunilu soraarsinneqartalissalluni, tamanna matuminnga patsiseqartinneqarpoq. Siullermik periaaseq nalinginnaasuuvoq suliffeqarfimmut imminut pigisumut siulersuisut suliffeqarfimmi pisortap atorfinitsinnissaanut soraarsinnissaanullu pisinnaatitaallutik, taamaalilluni siulersuisut akisussaanerat pisinnaatitaanerallu tunngavilerneqarpoq erseqqissarneqarlunilu, aappasaanik pisortat naalackersuinikkut ingerlatsinermik tunngaveqartumik toqqagaanissaat pinngitsoortinniarlugu, pingajusaanillu pisortaq tassaammat aningaasaqarneq pillugu siulersuisut tungaannut akisussaasoq aammalu siulersuisut Naalackersuisut tungaannut akisussaallutik suliniutinut nunatta karsianit tapiissuteqarfigisartakkanut atatillugu.

Aammattaaq peqqussummi atuuttumi § 3, imm. 1, nr. 4-mi pikkorissartitsinissanut pilersaarutip akuersissutiginiissaa pillugu piumasaqaat tapiissutit pillugit kapitalimut

nuutsinneqarpoq, pikkorissartitsinissamut pilersaarut suliniutinut pilersaarutitut taaneqalerluni.

*imm. 3-mut*

Aalajangersagaq nutaajuvoq. Aalajangersagaq minnerpaaffissatut aalajangersagaavoq, taamaattumillu siulersuisut malittarisassani sammisassanik allanik naleqquttunik ilanngussisinnaallutik. Assersuutigalugu siulersuisut sulinissaminut najoqutassaasat malittarisassanut ilanngunneqarsinnaalluni.

*§ 7-imut*

*imm. 1-imut*

Peqqussummi atuuttumi § 4-mi oqaasertaasa aqqissuunneqarnerat taamaallaat allannguuteqarpoq. Kultureqarnermut Atuartitaanermullu Aqutsisut allanngortinneqarpoq imaalillugu: Naalackersuisut.

*imm. 2-mut*

Peqqussummut atuuttumut § 4-mi tunngatillugu aalajangersagaq allanngortinneqarpoq. Peqqussummi massakut atuuttumi utertitsinissaq taamaallat pisinnaavoq folkehjuskolip pineqartup siulersuisuinik isumaqatiginninniareernikkut. Tamanna allanngortinneqarpoq imaalillugu Naalackersuisut pissutsit folkehjuskolinut siunertanut akerliusut aqqinnissaannut annertunnginnerusunik peqqussuteqarsinnaallutik, akuersissutip utertinnissaanut Naalackersuisut iliuuseqalersinnagit.

*§ 8-mut*

Tapiissuteqarnissamut piumasaqaatit imaasigut allanngortinneqarput. § 6, imm. 1, nr. 1 aamma 2 Inatsisartut peqqussutaanni atuuttumi atorunnaarsinneqarput, najoqutassat allat malillugit tapiissutit tunniunneqartalissammata, takuuk § 8-10.

Peqqussummi atuuttumi pisortaq ilinniartitsullu akissarsiaqartinneqartussaapput maleruagassat Kultureqarnermut Atuartitaanermullu Naalackersuisumit aalajangersarneqartut malillugit. Taamaalilluni aalajangersagaq taanna imaalillugu iluarsineqarpoq pisortat ilinniartitsullu akissarsiaqartinneqartalissallutik Naalackersuisut isumaqatiginninniartarnermut susasaqarfiisa iluanni atorfinnut taamaaqataannut maleruagassat malillugit.

Tamatuma saniatigut piumasaqaatit ilanngunneqarput siulersuisut ukiumoortumik nalunaarusiamik saqqummiussalissasut naatsorsuutit saqqummiunnerannut peqatigitillugu. Ukiumoortumik nalunaarusiaq sakkussaasaaq pitsaasoq folkehjuskolimi ineriartornerup malinnaaffiginissaanut nakkutilliisutut oqartussaasunut.



## § 9-immut

### *imm. 1-immut*

Tapiissuteqarfigineqarnissap anguneqarnissaanut piunasaqaataavoq folkehjuskoli atuartitsivittut tapiissuteqarfigineqarsinnaasutut sap. akunnerini 36-ni ingerlatsissasoq amerlanerpaamik hujskolimiinnissanut marlunnut avillugit. Piunasaqaataavortaaq hujskolimiinneq ataaseq sivikinnerpaamik sap. akunnerinik 13-inik sivisussuseqassasoq. Sap. akunnerinut 13-inut aalajangiisoqarneranut pissutaavoq ilinniagaqarnersiuteqartitsineq pillugu malittarisassanut ataqatigiissaarisoqarnissaa kissaatigineqarmat, tassami atuartitaanernut qaammatit pingasut sinnerlugit sivisussusilinnut taamaallaat ilinniagaqarnersiuteqartitsisoqarsinnaammat.

Tamatuma saniatigut tapiissutisinissamut piunasaqaataavoq hujskolip ataatsip ikinnerpaamik aningaasartuutissat naatsorsorneranni ilinniartut katillugit 20-t ukiumut atuartorissagai (20 årselever).

### *imm. 2-mut*

Nassuiaatitut aalajangersakkami aalajangersarneqarpoq ukioq naallugu atuortoq tassaasoq sap. akunnerini 36-ni atuortoq. Assersuutigalugu hujskoli sap. akunnerini 18-ini 30-nik atuortoqarsinnaavoq, tamannalu ukioq naallugu atuartunut 15-inut naapertuuppoq, hujskolimiinnissamilu tulliuuttumi sap. akunnerini 18-ini 10-nik atuortoqarsinnaavoq, tamannalu ukioq naallugu atuartunut 5-nut naapertuulluni. Folkehjuskolip taamaattup tapiissutisinissaq angusimassavaa.

### *imm. 3-mut*

Aalajangersakkami erseqqissarneqarpoq tapiissutissat naatsorsorneqartassasut ukiumut ilinniartorineqartut amerlassusiat aammalu tapiiffigineqarsinnaatitaallutik sapaatit akunneri atuartitsivigineqarsimasut amerlassusiat aallaavigalugu. Tapiissutissat naatsorsorneqartarnissaannut § 9, imm. 4, tunngavigalugu Naalakkersuisut erseqqinnerusunik malittarisassiussapput. Siunertaavoq hujskolinut marluusunut tapiissutit naatsorsornerqarnerannut malittarisassat, aningaasanut inatsimmi aningaasaliissutigineqartunut naapertuutissasut , tassa § 9, imm. 1-mi piunasaqaataasunik eqqortitsisimagunik.

### *imm. 4-mut*

Tapiissutit tunniunneqartarnissaat aquunneqarnissaallu pillugit malittarisassaliornissamut Naalakkersuisut piginnaatinneqarput.

Naalakkersuisut kissaatigaat Naalakkersuisut sullissivinnut nammineerlutik ingerlattunut tunngatillugu kiisalu Inatsisartut aningaasaliissutaannut atatillugu nakkutilliisussaataitanerannut pisariaqartumut Naalakkersuisunut periarfissiisunik tunngavissiortoqarlunilu periusissiortoqarnissaa.

Naatsorsuusiortarnissaq pillugu malittarisassani pineqartussaassapput ilinniartut amerlassusiat pillugu folkehjuskolit nalunaarutigisartagassaat Ilinniagaqarnersiuteqartitsivimmilu ilinniartut tapiiffigineqartartutut nalunaarsorsimasut amerlassusiisa ataqatigiissaarneqartarnissaat. Ilinniartut angalanerat ilinniarnersiutileriffimmit § 12 naapertorlugu akilerneqartassaaq. Ilinniagaqarnersiuteqartitsiviup ilinniartut amerlassusiat qanorlu sivisutigisumik folkehjuskolimiinnerat nalunaarsuiffigisassavaa.

Tapiissutit tunniunneqartarnissaanut malittarisassat imaattussaassagunarput arlaatigut akiliuteqarallartarnissaq pisartussanngorlugu, ukiumullu ilinniartunik naatsorsuinerit qulaani allanneqarsimasut aallaavigalugit kingusinnerusukkut iluarsisuteqartoqartassalluni.

### *§ 10-mut*

Aalajangersagaq nutaajuvoq. Tassani siulersuisut aningaasanik atuisinnaanissaminut pisinnaatitaanerat aalajangersarneqarpoq. Siulersuisut folkehjuskolip aningaasaataanik tamanik kiffaanngissuseqarlutik atuisinnaatitaapput, folkehjuskolit siunertaani tunngaviliussat iluanni aammalu Nunatta karsiata tapiissutaanut aningaassaliinermi tunngavissarititaasut iluanni. Aalajangersakkap tunngavilerpaa taanna suliffeqarfiummat imminut pigisoq, ukiumit aningaasaliiffiusumit ukiumut aningaasaliiffiusumut tulliuttumut aningaasanik nuutsisinnaasoq.

Aammattaaq aalajangersakkami tapiiffigineqarnissamut piumasaqaatit aalajangersarneqarput, imaalillugu siulersuisut tapiissutunik atuisinnaanerat tapiissummi tunngavissarititaasunut killeqartinneqarluni, atuartitsinermut ilinniartullu amerlassusiannut tunngatillugu. Aalajangersagaq § 9-mut naleqqussagaavoq, tassani pineqarmata tapiissuteqariaatsit tapiissutillu annertussusissaat aammalu aalajangersakkami tassani aalajangersaavigineqarluni tapiissutit annertussusissaannut aalajangiisuusartussaasut ukiumut ilinniartorineqartartussat qanoq amerlatigisarnissaat kiisalu sapaatit akunneri atuartitsivigineqartartussat qanoq amerlatigisarnissaat.

### *§ 11-mut*

Aalajangersagaq allaqqiineruvoq peqqussummi atuuttumi §§ 12-13-ininngaanneersunik, kisiannili Namminersornerullutik Oqartussat allanngortinneqarluni Naalackersuisunut. Aalajangersakkami erseqqissarneqarpoq folkehjuskolini perorsaanikkut, atuartitsinikkut ilinniartitsinikkullu sulisut ukiumoortumik pikkorissarnissaminut qinnuteqaateqarsinnaasut meeqqat atuarfianni ilinniartitsisunut periaaseq assigalugu.

### *§ 12-imut*

*imm. 1-imut*

Aalajangersagaq nutaajuvoq. Tassani ilinniartut ilinniagaqarnersiutunik pissarsinissamik pisinnaatetaaffeqaataasumik folkehujskolimiinnerminnut atatillugu tapiiffiqineqarnissamik ilinniartut piumasaqaataannut maleruagassat aalajangersarneqarput. Peqqussummi atuuttumi kommunit ilinniartunut tapiissutit akilertussaavaat. Ilinniartut angalaneri folkehujskolinut tapiissummit akilerneqartarput, taamaalillunilu hujskolit ilinniartussanik illoqarfinit qaninnerusunik tigusinissamut tunngavississinnaallugit taamaaliornikkut angalanernut aningaasartuutissat ikilisarniarlugit.

Allannguinnissamut kissaateqarnermut tunuliaqutaasoq tassaavoq kikkunnut tamanut nunap suani najugaqaraluaraanniluunniit kommunillu aningaasaqarnikkut pisinnaassusiat apeqqutaatinnagu assigiimmik periarfissaqartitsinissamik kissaateqarneq.

Aalajangersakkami taamaallaat pineqarput sivisunerusumik hujskolimiinnerit, tassa sap.ak. 13-t sinnerlugit. Tamanna aaqqissuussinnermit massakornit nunatta karsianut annerusumik aningaasartuutaalissaaq. Kommunit ilinniartunut sivisunerusumik hujskolimiittunut aningaasartuutaat ikinnerulissapput.

Ilinniartut ilinniagaqarnersiuteqarnissamik piumasaqaataat ilinniagaqarnermut aningaasaliissutitut annertussuilerneqarput nerisaqarneq ineqarnerlu ilanngaatigalugit qaammammut 1.850 kr.-inut kiisalu folkehujskolimit utimullu angalaneq. Aaqqissuussinerup taassuma allaffissornikkut ingerlanneqarnera pisinnaassaaq Ilinniagaqarnersiuteqartitsivik aqutigalugu pisariaqarpallu folkehujskolit suleqatigalugit.

*imm. 2-imut*

Aalajangersagaq Inatsisartut peqqussutaannit atuuttumit § 9-mit uteqqiineruvoq, siunertaanngilaq suleriaasiusimasumi allanngortitsinissaaq. Folkehujskolit sap. akunneranut atuartumut akiliutissamik siunnersuuteqassapput KANUKOKA-mut saqqummiunneqartussamik aammalu § 12, imm. 3 naapertorlugu Naalakkersuisut KANUKOKA-llu akornanni isumaqatigiissummut ilanngunneqartussamik. Taamaattorli aalajangersagaq allannguuteqarpoq, taamaalilluni Pisorta qarfiup Naalakkersuisut sinnerlugit sivisunerusumik hujskolimiinnissanut atuartumut akiliutissaaq taamaallaat isumaqatigiissutigissallugu. Pisorta qarfiup tamanna najoqqutaralugu sivikinnerusumik hujskolimiinnissanut tunngasumik pisinnaatitaaffeqassanngilaq kommunillu aammattaaq hujskolimiinnissanut sivikinnerusunut atuartumut akiliuteqarnissaminni akiliinissaminnut pisinnaatitaanatik.

*imm. 3-imut*

Pisorta qarfiup Naalakkersuisut sinnerlugit atuartumut akiliutissaaq pillugu hujskolit inassuteqaataat KANUKOKA-mut saqqummiutissavaa. Aalajangersagaq peqqussummi atuuttumi § 9, imm. 3-p assigaa. Aalajangersakkami annikitsumik

allannguineqarpoq, taamaalilluni oqaaseq "isumasioreerlugu" "inassuteqaat"-mut taarsiullugu. Oqaatsip "isumasioreerlugu"-p atorneranut pissutaavoq tamatumani piumasaqaataammat KANUKOKA´p Pisorta qarfiullu akornanni isumaqatigiissimanissaq. Illuatungeriit tamanna najoqqutaralugu kommunip atuartumut akiliutissaata aammalu atuartup nammineerluni akiliutissaata akornanni agguataarinissaq isumaqatigiissutigissavaat. Imm. 2-mi nassuiarneqartutut kommunit atuarnerni sivikinnerusuni atuartumut akiliutissap ilaa akilissallugu pisussaataaangillat. Tamanna kommuninut tunniunneqarpoq taakkua namminneerlutik nalilissammasuk atuarnernut taakkununga tapiissuteqarumanerlutik.

Siunnersuummi aammattaaq siornatigut kommunikkoortumik tapiissutinut killilersuinerit uteqqinneqanngillat, tamatumani ilanngullugu kommunikkoortumik tapiissutit 80%-iunissaat kiisalu atuartup aningaasaqarneranut tunngasut kommunit eqqarsaatigisinnaasariaqaraat. Tamatumunnga pissutaasoq tassaavoq atuartumut akiliutissaq Pisorta qarfimminngaanniit Naalakkersuisut sinnerlugit aalajangersarneqassammat aammalu kommunikkoortumik akiliutissaq KANUKOKA-p Pisorta qarfiullu akornanni isumaqatigiinniutigineqarluni. Taamaalilluni atuartoq hujskolimi atuartussatut tiguneqartoq inatsisitigut piumasaqaateqarsinnaavoq kommunimit najukkamit aningaasat ilaasa isumaqatigiissutigineqartut pissarsiarinissaannut. Tamatumani taamaattoq kommunit mattunneqanngillat aningaasatigut inissisimaneq aallaavigalugu amerlanerusunik tapiissuteqarnissaminnut, taamaaliorsinnaappummi inunnik isumaginninnermi inatsit malillugu, tamannalumi aamma ullumikkut periaasiuvoq.

### *§ 13-imut*

Peqqussummi atuuttumi § 5-imut naleqqiullugu oqaasertaliussat allanngortinneqarput imaalillugu Naalakkersuisut nakkutilliisuusussanngorlugit. Nakkutilliinermik suliaasaq Kultureqarnermut, Atuartitaanermut, Ilisimatusarnermut Ilageeqarnermullu Pisorta qarfiup ulluinnarni ingerlatarisussaassavaa. Peqqussummi massakut atuuttumi Kultureqarnermut Atuartitaanermullu Aqutsisut nakkutilliisussaataapput. Aammattaaq ilanngunneqarpoq pisorta qarfik siunertamut paasisutissanik pisariaqartinneqartunik pissarsiniarsinnaasassasoq. Aalajangersagaq taanna inatsisitigut tunngavigalugu paasisutissat folkehujskolit nakkutiginissaannut pisariaqartinneqartut naleqquttut tamaasa piumasarisinnaavai. Folkehujskoli paasisutissanik pisariaqartinneqartunik tunniussinngippat, pineqaatissaq tassaasinnaavoq tapiissutinik tunniussaqaannginnej.

Tapiissutit utertinneqartarnissaat unitsinneqartarnissaallu pillugit malittarisassiornissamut Naalakkersuisut piginnaatinneqarput. Folkehujskolip sammisassat tapiissuteqarnermut tunngavissaliunneqarsimasut naammassiniarsimangippagit tapiissutit utertinneqarnissaannut imaluunniit tapiissutit unitsinneqarnissaannut piumasaqaateqarsinnaanermut Naalakkersuisut periarfissiivigineqarnissaat pingaartuuvoq.

#### *§ 14-imut*

Aalajangersakkap peqqusummi atuuttumi § 14 assigaa, kisianni § 14, imm. 2 siunnersuummi ilanngunneqanngilaq, tamanna naleqquttutut isumaqarfigineqanngimmat, misiligaalluni suliaqarnermut saniatigut aningaasaliinissaq Inatsisartunit akuersissutigineqartussaammat.

Naalackersuisut misiligummik suliassat siuarsarnissaannut tunngaveqassapput aningaasaliissutitut atuuttut killissarititaasa iluanni.

#### *§ 15-imut*

Inatsisartut peqqussutissaat 1. januar 2003-mi atuutilissaaq tamannalu ilaatigut pissuteqarpoq aningaasatigut kingunissat aammalu aningaasanut inatsisip akuersissutigineqarnissaata akornanni ataqatigiittoqarnissaanik kissaateqarnermik.